

UDHËZIM
Nr.4, datë 9.3.2009

PËR ORGANIZIMIN DHE FUNKSIONIMIN E KOMISIONIT TË QENDRËS SË VOTIMIT

Komisioni Qendror i Zgjedhjeve në mbështetje të nenit 21 pika 1, nenit 23 pika 1, germa “b”, nenit 36 e vijues të ligjit nr. 10019, datë 29.12.2008 “Kodi Zgjedhor i Republikës së Shqipërisë”,

UDHËZON:

PJESA I
TË PËRGJITHSHME

Neni 1
Qëllimi

Ky udhëzim ka për qëllim të rregullojë mënyrën e ngritjes, organizimit dhe funksionimit të komisionit të qendrës së votimit, caktimin e rregullave për zhvillimin e mbledhjeve dhe marrjen e vendimeve.

Neni 2
Parime të përgjithshme

1. Komisioni i qendrës së votimit është organ kolegjal. Ai përgjigjet për administrimin e procesit të votimit në qendrën e votimit.

2. KQV-ja ushtron veprimtarinë e vet në përputhje me ligjin, në mënyrë të paanshme, profesionale dhe transparente. Të drejtat dhe detyrat e KQV-së përcaktohen në Kodin Zgjedhor dhe në aktet nënligjore të KQZ-së.

PJESA E II
PËRBËRJA E KQV-SË

Neni 3
Ngritja e KQV-së

1. KQV-ja përbëhet nga shtatë anëtarë dhe sekretari, të cilët emërohen nga KZAZ-ja vetëm për periudhën e zgjedhjeve. Në zgjedhjet për Kuvendin e Shqipërisë të datës 28 qershor 2009, KQV-ja formohet sipas mënyrës dhe kriterëve të nenit 29 të Kodit Zgjedhor.

2. Anëtarët e KQV-së propozohen nga partitë politike si më poshtë:

- a) Dy anëtarë të propozuar nga Partia Demokratike e Shqipërisë;
- b) Dy anëtarë të propozuar nga Partia Socialiste e Shqipërisë;
- c) Një anëtar i propozuar nga Partia Republikane Shqiptare;
- d) Një anëtar i propozuar nga Partia Socialdemokrate e Shqipërisë;

e) Anëtari i shtatë propozohet në gjysmën e KQV-ve nga Partia Demokratike e Shqipërisë, ndërsa në gjysmën tjetër nga Partia Socialiste e Shqipërisë, sipas rregullave të përcaktuara në nenin 5 të këtij udhëzimi.

3. KZAZ-ja emëron anëtarët e KQV-së jo më vonë se pesë ditë nga paraqitja e propozimeve. Në çdo rast emërimi i tyre bëhet jo më vonë se 20 ditë para datës së zgjedhjeve.

4.a) KZAZ-ja emëron kryetarin e KQV-së sipas propozimit të paraqitur nga partia politike, e cila ka tre anëtarë në komisionin e qendrës së votimit.

b) KZAZ-ja emëron zëvendëskryetarin e KQV-së sipas propozimit të paraqitur nga partia politike, e cila ka dy anëtarë në komisionin e qendrës së votimit.

5. KZAZ-ja emëron sekretarin e KQV-së me propozim të partisë politike, e cila ka paraqitur propozimin për zëvendëskryetarin e KQV-së.

Neni 4

Paraqitja e propozimeve nga partitë politike

1. Propozimet për anëtarë të KQV-së paraqiten nga partitë politike të përcaktuara në nenin 3 pika 2 të këtij udhëzimi. Partitë politike mund t'iu delegojnë degëve lokale të tyre të drejtën e propozimit për anëtarë të KQV-ve që përfshihen në territorin që mbulon dega lokale përkatëse.

2. Propozimi për anëtarët dhe sekretarin e KQV-së përmban: emrin, atësinë, mbiemrin, datëlindjen, adresën e vendbanimit, si dhe arsimin e personit që propozohet.

Neni 5

Caktimi i anëtarit të shtatë të KQV-së

KZAZ-ja cakton sipas procedurës së mëposhtme, partinë politike që ka të drejtë të propozojë anëtarin e shtatë.

a) KZAZ-ja rendit duke nisur nga QV-të me numër më të vogël dhe duke vazhduar në rend rritës, të gjitha QV-të që ndodhen brenda zonës së administrimit zgjedhor.

b) Në rastet kur një QV ndahet në një ose më shumë QV të tjera, atëherë QV-të renditet pas QV-së së origjinës.

c) KZAZ-ja emëron anëtarin e shtatë të KQV-ve të renditura me numër tek, me propozim të partisë politike, e cila ka propozuar zëvendëskryetarin e KZAZ-së.

d) KZAZ-ja emëron anëtarin e shtatë të KQV-ve të renditura me numër çift, me propozim të partisë politike, e cila ka propozuar kryetarin e KZAZ-së.

Neni 6

Emërimi i anëtarëve të KQV-së

1. KZAZ-ja, pasi konstaton se propozimet janë në përputhje me kërkesat e neneve 37 dhe 38 të Kodit Zgjedhor, emëron me vendim anëtarët e KQV-së. Për emërimin e tyre KZAZ-ja përdor modelin – 03 V “Për emërimin e anëtarëve të KQV-së”, miratuar me vendimin KQZ-së, nr.14 datë 23.2.2009.

2. Për emërimin e anëtarëve dhe të sekretarit të KQV-ve, KZAZ-ja mban parasysh të dhënat, që lidhen me ushtrimin e funksionit nga ana e tyre, ku përfshihen edhe trajnimet që ata kryejnë, si dhe masat disiplinore të marra ndaj tyre.

Neni 7

Emërimi i kryetarit, zëvendëskryetarit dhe sekretarit të KQV-së

1. Për emërimin e kryetarit, zëvendëskryetarit dhe sekretarit të KQV-së, KZAZ-ja përdor modelin - 04 V “Për emërimin e kryetarit, zëvendëskryetarit dhe sekretarit të KQV-së”, miratuar me vendim e KQZ-së nr 14 datë 23.2.2009.

2. Sekretari i KQV-së emërohet me propozim të partisë, e cila ka propozuar zëvendëskryetarin e KQV-së.

Neni 8

Shkarkimi dhe lirimi i anëtarëve dhe i sekretarit të KQV-së

1. Anëtari dhe sekretari i KQV-së shkarkohen nga detyra sipas përcaktimeve të nenit 39 pika 1 të Kodit Zgjedhor.

2. Anëtari dhe sekretari i KQV-së lirohen nga detyra sipas përcaktimeve të nenit 39 pika 2 të Kodit Zgjedhor.

3. Shkarkimi dhe lirimi bëhet me vendim të KZAZ-së.
4. Anëtari dhe sekretari i KQV-së, i shkarkuar me vendim të KZAZ-së, nuk mund të rizgjidhet në këtë detyrë.
5. Një kopje e masave disiplinore të marra nga KZAZ-ja, në lidhje me shkarkimin e anëtarëve dhe sekretarit të KQV-ve, dërgohen në KQZ.

Neni 9

Plotësimi i vendit vakant

Kur vendi i një anëtari të KQV-së mbetet vakant, KZAZ-ja i kërkon degës lokale të partisë politike përkatëse të paraqesë propozimin për anëtarin e ri. Emërimi i anëtarit të ri bëhet sipas afateve dhe kritereve të përcaktuara në nenin 36, pika 4 dhe 5, të Kodit Zgjedhor.

PJESA III

Neni 10

Detyrat e anëtarëve dhe sekretarit të KQV-së

1. Anëtarët e KQV-së përgjigjen për zhvillimin e zgjedhjeve në qendrën e votimit, duke zbatuar detyrat e parashikuara në Kodin Zgjedhor, si dhe vendimet e udhëzimet e KQZ-së.
2. Sekretari i KQV-së zbaton të gjitha detyrat sipas përcaktimeve të nenit 41 të Kodit Zgjedhor, si dhe vendimet e udhëzimet e KQZ-së.

Neni 11

Dokumenti i identifikimit

Gjatë ushtrimit të detyrës, anëtarët dhe sekretari i KQV-së janë të detyruar të mbajnë në mënyrë të dukshme dokumentet e identifikimit sipas modelit të miratuar nga KQZ-ja.

PJESA IV

MBLEDHJET E KQV-SË

Neni 12

Mbledhjet dhe vendimet KQV-së

1. Mbledhjet e KQV-së janë publike.
2. Mbledhjet e KQV-së janë të vlefshme, kur në to marrin pjesë më shumë se gjysma e të gjithë anëtarëve të KQV-së. Vendimet e KQV-së merren me shumicën e votave të të gjithë anëtarëve të KQV-së. Sekretari nuk ka të drejtë vote.
3. Vendimet e KQV-së nënshkruhen nga të gjithë anëtarët që kanë marrë pjesë në votim. Secili prej anëtarëve, krahas nënshkrimit të tij në vendim, deklaron votën pro ose kundër, si dhe arsyetimin përkatës.
4. KQV-ja merr vendime, sipas përcaktimeve të nenit 42 pika 4 të Kodit Zgjedhor, duke përdorur modelet tip të vendimeve të miratuara nga KQZ-ja.
5. Të gjitha vendimet e KQV-së shënohen në librin e protokollit të mbledhjeve të KQV-së.

Neni 13

Ky udhëzim hyn në fuqi menjëherë.

KRYETARI
Arben Ristani